

Tito

**Pablo shuc camachic runa Tito
nishcama quillcashcamanda**

1 ¹Llaquishca Tito,
Ñáucaga Diospacta rauc mani.
Jesucristo japihuasha camachigri
nisha cachashca runa mani. Yaya
Dios japistha runagunaga sinzhita
quirinauchun nishami rimauni,
chasnallata paiguna Diospa sirtu
shimita yachanauchun nisha rimac
runa mani. ²Cai pachata chara mana
rashcallaita mana llullac Dios casna
rimashcami, Ñáucahua runagunaga
ñucahuhan huiñai causanaungami nisha
rimara. Chita quirishami causaunchi.
³Pai munashca uraspiga pai chasna
rimashcaga cunan pactarishcami.
Chasnamanda ñucanchita quishpichic
Diosca mandahuara ñuca chi shimita
camachichun nisha.

⁴Ñáuca pahua shimita yachachicpi,
can ñucacuinta shinallata quirisha
ñuca churicuinta shinami tucushua
acpi, ña cunan canda quillcauni Tito.
Yaya Diospas ñucanchita quishpichic
Jesucristohuas canda llaquisha can
mana manzhasha cungailla causaita
cunauchun nisha tapuni.

Creta nishca islai Tito camachiunmi

⁵Chi Creta nishca jatun islaibi canda
saquisha chi quiric runagunahuacpi
ñuca chara mana alichishcagunataga
can ña tucuchichun nisha saquirani.

Ñáuca canda mandashcashina caran
llactaibi yuyaiyuc ali quiriccunata
mascasha japisha churangui paiguna
tucui quiriccunata cuirangahua.

⁶Chi quiriccunata cuirauc runaga
jucha illac puric runa achun, shuc
huarmillahuan causachun. Pahua
huahuagunahuas quiric anauchun,
mana lucu asha randi ali uyac
huahuaguna anauchun, shuccunaga
paiguna raushcamanda ima jiridsata
rimanauchun nini.

⁷Quiriccunata cuirasha yachachic
runaga Diospacta raushcamandami
ima juchatas mana rashachu
causana an. Chi runaga mana
mandaisiqui, mana piñarisiqui
anachan. Chasnallata mana machac,
mana macaisiqui anachan. Mana
ali rashcamandas ganashcata ima
japichun. ⁸Randi shuccunata pahua
huasima cushihuan pasiachic
runa anami. Chi runaga tucui ali
ranagunata llaquinami. Mana pahua
quiquin aicha munashcatachu rana
an. Dios munashcatami rasha causana
an. Pahua shungu ucuibi jucha
munaita binsisha alita yuyarisha
causana an. ⁹Diospa sirtu shimita
yachachishcataga alita yuyarisha
catichun. Chasna rasha chi Diospa
ali shimihianga shuc quiriccunata
yanapanata ushanmi, chasnallata
chi cuntar rimac runaguna
llullashcagunata alichinata ushanmi.

Llullasha rimaccunamanda

¹⁰Charami ashca runaguna
Diospa ali shimita mana cadsunata
munasha yanga shimita yachachisha
llullaunguna. Huafuc Moises
mandashcagunata tucuita pactachina
anguichi quishpichisheca tucungahua
nishami llullasha yachachiunguna.
¹¹Chicuinta yachachiccunataga
saquichina mangui Tito. Paigunaga
chasna yachachishami shuccunata
pandachiunguna, maican huasibi tiyac
aillugunatas tucuita huaglichiunguna.
Cullquita ganangahuallami chasna
chi llullasha pandachina shimitaga
yachachiunguna. ¹²Paiguna
quiquin llactamandalatami shuc
quillcac runa casna nishca: Creta
runagunaga tucui uras llullasha
rimaungunami. Sacha aichacuinta
paigunallata yuyarisha yapa
jiridsatami causitunguna, quillasha
mana tarabasha shucpa micunata
micuccuna aunguna nisha. ¹³Chi
chasna rimashca shimiga sirtu man.
Chiraicumanda chi Creta runagunata
yapa sinzhita rimasha yachachi Tito,
paigunahuas Jesucristota alita quirisha
causanauchun.

¹⁴Paiguna israel rucuguna yanga
rimashcagunata ama mas uyanauchun
nisha sinzhita rimai. Maican
yachachiccuna Diospa sirtu shimita
yachachina randimanda yanga rimasha
mandashcagunata yachachiunguna.
Creta runaguna ima chigunata
uyanauchun nisha sinzhita rimangui.

¹⁵Ñáa sumac causac runaga tucui
uras alita yuyarisha sumac causanmi.
Randi mana quiriccuna, mana ali
causaccunahuas imahuas mana ali
yuyarishcachan. Chasna acpi paiguna
shunguhuas yuyaihuas huagliishca
anaun. ¹⁶Chi runaguna Diosta

quiric manchi nishallatami yanga
shimillahuan rimanaun. Paiguna
rashcagunaga ricuchinaunmi mana
Diosta quiric runa ashcata. Alita
rana randimandami piñarisiqui
anaun, Diospa shimita mana cadsuc,
chasnallata ima ali ranatas mana
ushanaunzhu.

Ali yachachinata uyasha causnamanda

2 ¹Can Diospa sirtu shimitaga chi
runagunata alita yachachingui.
²Quiriccunata cuirac runagunaga
mana machasha, tucuimanda alita
yuyarisha, paiguna quiquin aichata
alita mandasha causana manauchun
nisha yachachingui. Chasnallata
paiguna sinzhita quirisha, shuccunata
alita llaquisha, ali ranagunata mana
saquisha causana manauchun nisha
yachachingui Tito.

³Chasnallata quiriccunata cuirac
huarmigunatas yachachingui paiguna
Dios munashcacuinta causanauchun
nisha, alita ranami, mana machasha,
shuccunamanda mana jiridsata
rimasha. Chasnammada shuc
huarmigunata yachachinauchun
imasna ali causana acta. ⁴Chasna
causashami chi shuc mas quipa
huarmigunata yachachinata
ushanaunga caran shuc pahua carita
huahuagunatahuas llaquingahua.

⁵Chasnallata paiguna quiquin aichata
mandasha sumacta causanauchun
alita yuyarisha, pahua quiquin
huasibi alita tarabasha, pahua carita
cadsusha, shuccunatas yanapasha
causana man nisha yachachinauchun.
Chasna causacpi shuccunaga
Diospa shimitanda mana jiridsata
rimanaungachu.

⁶Chasnallata musugunatas
yanapangui paiguna quiquin

munaitaga ama ranauchun, randi ali yuyaihuan purinauchun nisha yachachingui.⁷ Can alita rasha causana mangui Tito, paiguna can raushcata ricusha alita catinauchun nisha. Ama yanga pugllaicuinta ali shimihuan yachachingui.

⁸Tucui uras yapa alita rimangu. Chasna causacpimi shuc canda piñasha cuntar shimita rimac runaga pingaringami pai ñucanchimanda yanga llullashcamanda.

⁹Quiric tarabaccunatas yachachingui paigunata mandac amuta alita cadsunauchun. Imata rashahuas alita ranauchun paita mandac amuta cushiyachingahua ama piñarisha ai ninauchun.¹⁰ Chasnallata paita mandac amumanda ama shuhuanauchun, astahuuanbas alita uyasha paigunata mandac amu munashcata rasha tarabanauchun. Paiguna chasna alita rasha causacpiga shuccunahuas ñucanchita quishpichic Diospa shimi ali man nishami rimanaungami.

Ñaucanchi yachanamanda

¹¹ Yaya Diosca tucui runaguna quishpishca tucunauchun nisha munashami paihua yapa ali llaquishcata ricuchimura.¹² Pai llaquishami ñucanchita yachachin mana ali yuyarisha causanatas, cai mundu jucha munaitahuas saquinauchun nisha. Chigunata saquisha ñucanchi causaita alita rasha, caran punzha Dios munashcata rasha ali sumacta causachun nishami ñucanchita yachachin.¹³ Chasna acpimi Jesucristo shamenata cunanga cushihuan chapauchi. Chi punzhaga ñucanchita quishpichic Jesucristo jatun Diosca jatun mandac amu asha sumac ricurisha shamungaraushcata

chapauchi.¹⁴ Paiga ñucanchimanda huañurami tucui juchagunamanda illacta lugaryachingahua. Ñaucanchita quishpichira paihua quiquin runaguna tucunauchun nisha, ñucanchi paihuacta alita ranata yapa munac runaguna tucunauchun nisha.

¹⁵ Chigunata yachachina mangui Tito. Dios canma cushca ushaihuanmi quiric runagunata yanapangui paiguna mas sinzhi quiric tucunauchun nisha. Paiguna mana alita raupiga camachingui Diosta cadsuc tucunauchun nisha. Chasnallata alita causangui pihuas canda ama caudsayachingahua ninimi.

Quiriccuna causanamanda

3 ¹Quiriccunata yachachingui paiguna amugunata, gubirnutas uyanauhun nisha. Chasnallata uctalla imatahuas ranauchun nisha yachachingui.² Chasnallata yachachingui ima pimandahuas jiridsata rimanauchun nisha, astahuuanbas mana piñasha shuccunata llaquisha causanauchun. Tucuigunahuan sumac llaquinacusha causanauchun nisha yachachingui.

³Chi Creta runagunashina ñucanchihuas ñaupa urasca chasnallata yuyai illaccuinta causac aranchi, Diosta mana cadsuccharanchi. Shuc huatashca runacuinta umachishca aranchi ñucanchi aicha munashcata rasha, mundu cushiyachinallata yuyarisha. Shuccuna charishcata munasha, mana alita rashami causac aranchi. Maicanguna ñucanchita piñacpihuas ñucanchihuas paigunata piñasha causac aranchi.

⁴ Chasna causacpihuas ñucanchita quishpichic Diosca tucuigunata llaquishami ricurimura.⁵ Chasna shamushami ñucanchita

quishpichitucuranchi. Mana ñucanchi ali rashcamandachu chasna rara, randi paiga ñucanchita llaquishcamandami quishpichira. Pai ñucanchita quishpichicpimi mushuc pagarishcacuenta jucha illac saquiriranchi. Diospa Samai ñucanchita mushuc causaita cushcaraicu paihua sumac runa tucuranchi.⁶ Ñáucanchita quishpichic Jesucristomandami Yaya Dios paihua Samaita ñucanchima pactacta cura.

⁷ Chasna acpi pai llaquishcamanda ñucanchi juchagunata anchuchicpi paihua huahuaguna ña tucuscanchimi. Chasna tucusha Diospa huiñai causaita charingaraushcata chapaunchi.

⁸ Chi shimiga sirtu man. Chasna acpimi Yaya Diosta quiriccunaga ima ali ranagunatahuas yuyarisha causanauchun nisha sinzhita mana manzhasha yachachingui Tito. Chasna Dios rashcaga yapa gustu ashami tucui runaguna Diospacpi alita causangahua yanapan.

⁹ Maican runagunaga yangamanda rimanacunaun. Paiguna huañuc apayayagunahua shutigunata japisha mas balic runa tucusha nishalla rimanaun. Shuccuna Dios mandashcagunamanda caran tunuta rimasha piñanacunaun. Paiguna chasna cuintaushcaibiga ima satiringuichu. Chi tunu shimiga yanga man, runagunata mana yanapanzhu.¹⁰ Chasna quiriccunata chaupichingahua rimac runata sinzhita rimai paihua causaita alichichun nisha. Pai mana saquicpiga

can cuti rimangui. Ishcai (2) cutin can saqui nisha rimagllaita chara chaupichisha nisha puriupiga, paita quiric muntunmanda callpachingui.

¹¹ Sirtu yachanguí chasna rac runaga yapa juchayuc asha mana ali ranagunama bultiashca acta. Pai quiquin jucha rashcamandami taripashca tucun.

Puchucai shirimanda

¹² Cunanga Artemasta cambagma cachangarauni, pai mana shamunata ushacpiga Tiquicota cachangarauni. Maican shamusha pactacpiga uctalla shamungui ushashaga. Ñáuca yuyarishcana sanjuan urasca Nicópolis nishca llactaibi pasangarauni nini, chibi pactamusha tupahuangui.

¹³ Chi quiric amu Zenas nishcata Apolostas camachisha puriccunata yanapangui. Paiguna cambagma shamusha pactacpi tucui paiguna minishtishcagunata cungui paiguna shuc llactagunama risha camachingahua.¹⁴ Shuccuna pishicpihuas tucui quiriccuna yanapanana manchi ñucanchi mana yanga causashcata ricunauchun. Quiriccunaga tucui uras alita ranata yachanauchun nini.

¹⁵ Tucui caibi ñucahuan aucuna canma saluduta cachanaun. Chibi auc ñucanchita llaquic quiriccunatahuas saludangui.

Yaya Dios cangunata llaquisha alita rachun nishami paitaga mañaasha tapuni.

Chillata rimani, Pablo.